

Item eyn ietlicher gang/hat sein hangends
vnd ligends. Hangends des gangs/ist sein
dach vber dem gang/daran sich der gang mit
dem rucken stoßt. Sein ligends ist sein gestey-
ne/darauff er leit. Doch sind etlich Geng/die
also gericht ir fallen haben/das man nit wol
hangends oder ligends daran erkennen kan/
dann alleyn von zufelligen hengflüfften/die
eyn anweisung darzu geben mögen/auch zu al-
len örtern der welt/als sie vorbenant sein/die
dessen erkantnuß besihe vorgehende figur.
Das sei gesagt von hangends vnd ligends der
Geng/Nun volgt von außghend der Geng.

Item / Eyn ietlicher Gang/hat zweyerley
außghend: Das eyn ist das außghend gegen
dem tag/nach der ganzen leng des Gangs/
Das heyst des ganzen Gangs außghend.

Das ander außghend ist wider das streich-
en/oder entgegen dem streichen des Gangs/
nach seinem gesteyn/Das heyst des gesteyns
außghend/Als eyn ietlicher Gang/der sein
streichen hat auß dem Morgen in den Abend/
der hat seines gesteyns außgang/gegen dem
Morgen/vnd widerumb von dem Abentinn
Morgen/der hat sein außghend in den Abent.
Also vernim auch von den andern örtern der
welt/vnd nach dem der Gang geschickt ist an
seinem streichen/so mag diß außghend der ge-
steyn auch sein/nach allen örtern der welt/als
in den vorgeschribnen figuren leichtlich zu ver-
nemen ist. Souil sei gesagt vom außghend d
Geng.

Zu mehrer erkantnuß diser iezgesagte stuck